

Willkommener Besuch.

Heit frieh kimmt, soll mer des dann mäne
En Hilbrief von de Tante Gret'
Un in dem Brief dud se erwähne,
Daß zu Besuch sie komme ded.
Der Vadder will devou nix wisse
Is nit von dem Besuch erbaut
Doch werd es Maul er halte misse
Bei dere, di redd' viel un laut.
Zum Peterche dud er jets sache,
Er sälwer dud's nadierlich nit:
"Du dust dich uff zum Bahnhof mache,
Un nimmst die alde Schachtel mit."
Im Kellereck, do stäht e Schachtel
Verbailt, verrisse un verschabt.
Der Baba mänt bestimmt d i e Schachtel
Dann die is ald un ganz verstaabt.
Sou mänt derBu, dud nit lang frache
Un mecht e starki Kordel drum.
Es is kën Staat damit zu mache
Des sieht er selbst, er is nit dumm.
Er nimmt se, mecht sich uff die Socke
Un säicht de Tante schäi "Grieß Gott"
Die streichelt em sei blonde Locke
Un frecht, was in de Hand er had.
Der Bu dud sich nit lang besinne
Un säicht de Tante klipp un klor:
"Des is e Schachtel, wou ganz hinne
Im Kellereck gestanne wor.
Der Baba, der dud zu mir sache
Warum, des wäs ich sälwer nit:
Du dust dich uff zum Bahnhof mache,
Un nimmst die alde Schachtel mit".